





Administration of Justice

# Ithute Tsamaiso ya Dikgotla Tshekelo tsa Botswana

**GO ITSE GO FETA FA, LELE TSA**

**HIGH COURT**  
Gaborone Division  
**+267 3718000**

**HIGH COURT**  
Francistown Division  
**+267 2412125**

Website: [www.justicegov.bw](http://www.justicegov.bw)

**Tollfree Number:**  
High Court - Francistown Division  
**0800 600 947**

**Tollfree Number:**  
High Court - Gaborone Division  
**0800 601 027**

**Tollfree Number:**  
High Court - Lobatse Division  
**0800 600 922**

Cartoons by: **Douglas Isreal** • Text by: **AOJ**

# Table of Contents

<b>Dikgotla Tshekelo.....</b>	<b>2</b>
<b>Tsamaiso Kgotla Tshekelo .....</b>	<b>4</b>
<b>Tsamaiso Ya Tshoko .....</b>	<b>7</b>
<b>Boitshwaro Mo Teng ga Kgotla Tshekelo .....</b>	<b>9</b>
<b>Go Fa Bosupi.....</b>	<b>13</b>
<b>Mokwalo wa Keletso Ya Kabo Boswa.....</b>	<b>15</b>

# DIKGOTLA TSHEKELO

Ke utlwile Moitiri a re o na le tsheko kgatlhanong le goromente ko High Court.

Oabo o reng tota Mma Moeteledi? O sekisa mang? Goromente? Mmaiyo!

Ee, a rialo.

Jang tota? A gona le motho yo o ka sekisang Goromente a le kanakana? Goromente kana o tshwana le modimo. Ga gona yo o ka mo sekisang.



A re o batlile agente go mo thusa mo tshekong eo.

Agente e ka dirang Goromente? Kana Goromente o laola sengwe le sengwe; mapodisi, diagente, dikgotla, gotlhe le baathodi tota. Gape ke ene yo o dirang melao e. Goromente o ka dira molao o o mo sekisang jang tota?

Go ka tswa go lebeга go ntse jalo. Mme ke utlwile Mogakolodi maloba a re ka fa molao wa rona o ntseng ka teng dikgotla tsa rona di ikemetse ka nosi. Ga di laolwe ke ope, gotlhe le ene Goromente tota. Baathodi le bo mmakaseterata le bone ga ba laolwe ke ope fa go tla mo tirong ya bone. Ga gona ope yo o ka ba rayang a re ba dire tiro ya bone ka mkgwa ofe. Ba athola tsheko nngwe le nngwe ba remeletse mo mabakeng a yone.

Ah wa rialo? Goromente o ka ba tlogela jang ba dira jalo?



Le molao motheo wa Botswana o a rialo. Ware dikgotla tshkelo di ikemetse ka nosi. Baathodi le bo mmakaseterata ba ikemetse ka nosi. Le kafa ba thapiwang ka teng ga go tshwane le ga babereki ba bangwe ba ga Goramente. Bone ba thapiwa ke Tautona ka kgakololo ya lekgotla le le ikemetseng ka nosi le le bidiwang Judicial Service Commission(JSC).

Lekgotla le lone la JSC, gakere maloko a lone ke babereki ba ga Goramente. Ba utlwa ka ene.

Nnyaal Maloko a lekgotla le ga ba tsee ditaolo mo go Goramente. Ke batho ba ba ikemetseng ka nosi ba ba sa laolweng ke Goramente

Maloko a lone ke bo mang?

Lekgotla le, Modulasetilo wa lone ke Moathodi Mogolo (Chief Justice). Maloko a lone ke Moathodi Mogolo wa kgotla ya boikuelo, Rra Melao Mogolo (Attorney General), Agente e e tlhophilweng ke lekgotla la diagente (Botswana Law Society), leloko le le tlhophilweng ke Tautona le Modulasetilo wa lekgotla la boikuelo la badirela puso(Public Service Commission).

Go riana ke ntse ke le mo leffing. O thusitse.

# TSAMAISO YA KGOTLA TSHEKELO



Kana nna monna ga ke itse sekgowa. ke ka ya teng jang? Gatwe go a chomiwa koo. Batho ke bao ka dipurapura tse di ntsho e kete magakabe. Ba a tshosa batho bao. O kare baruti mo phithong.


Ee, batho bao ke bone babueledi ba molao.

Go bangwe gatwe ke baatlhodi. Bone Ba dira eng?

Ke bone ba ba reetsang ditsheko le go di athola bao. Fa ba reetsa tsheko, ba tshwanetse gore ba tihomamisa gore mongwe le mongwe yo o amegang o a tihaloganyana.


O raya ba tihomamisa jang ne?

Fa tsheko e simolola, moatlhodi o tshwanetse go tihomamisa gore lotlhe ba lo amegang lo tihaloganyana puo ee buiwang. Ka fa molaong puo ya kgotla tshkelo ke sekgowa, mme fa o sa se tihaloganye oa tololelwa ka setswana. Mosekisiwa ene ka gore ke tsheko ya gagwe, go patelesega gore a bo a tihaloganyana puo ee buiwang gore a kgone go ipuelela.




Fa mosekisiwa a sa utlwe setswana, go dirwa jang?

Ba tlaa tshwanelwa ke go batla mongwe yo o buang teme ya gagwe. Molao motheo wa Botswana ware fa motho a sekisiwa o tshwanetse go tolokelwa ka teme e a e tihaloganyang.



Gatwe gone mo kgotleng moo ba garumela batho.

Nnyaa malome, ga baa tshwanela go dira jalo. Moatlhodi o tshwanetse go bona gore mongwe le mongwe o sireletsegile, gape o buisiwa sentle.



Bothale jwa phala bo tswa phalaneng. O ithutile tota ngwanaka. Jaanong ke a tshepha fa ke tihaloganya tsamaiso ya kgotla tshkelo, gape fa ke na le tshireletsego mo kgotleng.



# TSAMAISO YA TSHEKO

Mma Kediretsewe, Tshidi oa seka kwa High Khoto ka labobedi wa beke ee tlang. Motho o kare o ka ya go reetsa.

Ijo, Ijo, Ijoo! O a bo o simolotse? Ga o tshabe dilo kana wena. O ka ya koo? Dilo tse re di utwang ka mafelo ao rona dia re tshosa.

Ngwanaa kgaitsadiake gatwe o dikile a thukuthiwe sengwe le sengwe mo semausung ke magodu ka ditlhobolo. Ke raya go feela phsss.....!

Wareng? A di ne tsa tshwarwa ne dilalome tseo?



Ba tshwerwe ka yone merwalo mo nokeng e ya Metsimaswaane. Mme se se gagamatsang gatwe e rile ba tsena ko kgotleng, go itatola.

Ba itatola jang ba tshwerwe ka merwalo? Ke sone se gompieno sa ditshwanelo? Batho ba kile ba re senyetsa lefatshe ka ditshwanelo tihe.

Gatwe le fa o fitlhetswe jalo ga o kake wa atholwa fela o sa bodiwa gore a o ipona molato.

Le na le nako ya go tshameka tihe. E le gore ke eng motho a sa latlhele mo kgolegelong gone foo?



Molao motheo wa Botswana le wa tsamaiso ya ditsheko ya re fa o tshwerwe o bo o isiwa kwa kgotleng, moatlhodi o tshwanetse go go balela molato pele, a bo a go botsa gore a oa tihaloganyana, a feleletsa ka go tihomamisa gore a o ipona molato. Ke gone jaanong a ka tsayang tshwetso ya gore a o a go athola kana o laola gore basupi ba bidiwe.

Le senya nakol Serukuthi se a atholwa gone foo, le bo le kgaogana naso. ke sone se le bonang le na le ditsheko tsa melala jaana. Athola motho monna o kgaogane nae.




Go dira jalo e tlaabo e le kgatelelo e bile gole kgatlhano le molao wa tsamaiso ya ditsheko.

Motho o kile a re, "a re chencheng". Dilo di chenchitse e le ruri.



# BOITSHWARO MO TENG GA KGOTLA TSHEKELO



Ee mma, ene yoo! Gatwe o ne a thukuthwa ke batho kwa lwapeng la gagwe, ba mo tseela madi, mogala wa letheka le dithoto tsa ntlo tse dintsi thata. Mme kana dikgotla tse tsa lona tsa sekgoa ga di tshwane le tsa rona tsa setswana ka tsamaiso.

Ija, o seka wa tloga o tsaya sepora. Ga go sekelwe ko tlase ga setlhare. A ko o bitse Mogakolodi a go tshalosetse ka tsone dikgotla tshekelo tseo.



Go ntse jalo. Mogakolodi! Mogakolodi, a ko o tle kwano ngwanaka.

Ee rra ke tsile.



A ko o ntihabe podi matseba ka dikgotla tshekelo tsa lona.

Selo sa ntiha fa o tsena ka kgoro o tlaa fithela mapodisi ba itshireletso foo. Ya fa go bone o kope thuso. Ba tlaa go kaela kwa o batlang go ya teng.

Dikago tsa koo gatwe di mafaratthatiha

Ee, mme fa o bona gore o ka se goroge ba tlaa go isa teng koo. Fa o tsena fa kgotleng o fithela e simolotse, e re fa o fitlha fa kgorong o eme o bo o oba tlhogo.



Mm...mmm...mm...!  
Go matswakabele jang. Gatwe baathodi le diagente ba na le kapari ee farologaneng, e e sa tswaelesegang.

Ke nnete. Moathodi kapari ya gagwe e a farologana. Fa a dira tsheko ya borukuthi o apara purapura e khibidu. Mme fa a dira tsheko ya go agisanya o apara e ntsho.

Diagente di apara jang?

Diagente di apara dipurapura tse dintsho le melala e mesweu. Ke ba o ka reng magakabe ba.





Fa ke tsene, a e kare ke pitlagane ke eletsa go tihapologa ka tswa?

Ee, o gololesegile go tswa nako ngwe le ngwe. Mme fela fa o tswa, gakologelwa go oba tihogo fa kgorong. Gape o seka wa tsosa modumo.



Tihabologo!

Sengwe gape se o tshwanetseng go se ela tihoko ke fa moatlhodi a tsena lefa a tswa mo kgotleng.

O dira jang ne?

Fa moathodi a tsena, lepodisi la gagwe le tshwanetse go kokota gararo mo kgorong e a tsenang ka yone. Fa lebati le bulega mongwe le mongwe o tshwanetse go ema ka dinao.



O raya le Tautona tota?



Fa a le teng le ene o tshwanetse go ema. Se se supa tlotlo ya lekgotla. Moathodi o tlaa bo a re fa a sena go ema fa pele ga setilo sa gagwe, a bo a oba tlhogo go supa gore le ka nna fatshe. Fa a tswa le gone le ema ka dinao.



Tsamaiso e ke ee thata tota. Mme ke lebogela kgakololo ya gago Mogakolodi.

# GO FA BOSUPI

Koloi ya mapodisi ke eo e goroga mo lwapeng. Go a bo go rileng tota batho ba modimo fa mapodisi ba re etela jaana?

Ijoo! Dilo tse kana di a tshosa. Gase gore gona le mangwe mathata?

Dumelang mo lwapeng. A rre Nthoi o teng?

Ee rra. Ke nna yo.



Nna ke bidiwa Mogakolodi. Ke morongwa wa kgotla kgolo. Rra o batiwa kwa kgotleng kgolo ya Lobatse go ya go fa bosupi mabapi le tiragalo e o kileng wa e bona, ya dikgomo tsoora Morakeng.

Nna! Ko kgotleng ya High Khotol! E seng koo. Ba kgaola batho ditlhogo koo. Gape dikgomo tsame di ile le naga. Ga nkake ka ya koo ke di tlogela di phataletse jaana! Tsamaya o ba bolelele gore ke sa ile go batla dikgomo, ke tlaare motiha ke di bonye ke lo itsise gore ke teng.

Ijoo! Rra ko kgotleng? Bosupi!! Kana gatwe ba golega batho koo. Ba go tsenya mo kgolegolong rra. Rona re bo re sala re le dikhutsana re bolawa ke tlaa.



Kana tota Rre Nthoi batho ba, baa go pateletsa. Ga oa bona sepe. Ba go batlelang? O gakologelwe gore Tshumu o rile o tie go rema tshimo ya gagwe ka malatsi ao. Pula ea na le wena oa bona. Re tshwanetse ra baakanyetsa temo.

Mmang ke lo tihalosetse. Kana tsheko e ke ya borukuthi. Mosekisiwa gatwe o utsule dikgomo tsa ga Morakeng. Jaanong puso e lwantsha borukuthi joo. Wena rra ka gore o bone tiragalo e, o bilelwa gore o tie o thuse ka nnete ya se se diragetseng. Ga o kake wa golegiwa o sena molato. Re tlaa go thusa ka sepalamo, gothe le boroko le dijo fa o ile koo. Fa o sa thuse, bogodu jwa dikgomo bo tlaa tswelela. Mme le tsa gago di ka nna tsa re nako nngwe tsa utsuwa. Ke solofela o sa batle seo. Ke kopa gore o tie go thusa rra.

Le a ntheka ne? Nna ga ke batle madi ao a lona le boroko. Kare ke na le mathata. Kgomo tsa gaetsho di ile le naga. Temo e gorogile le yone. Ga gona nako ya go tshameka.



Nnyaa rra. Ga se gore oa rekwa. O a bo o thusiwa ka gore o ne o sa ipaakanyetsa ditshenyegelo tseo. Go fa bosupi go tsaya nakwana fela. Gongwe letsatsi. O tlaabo o dirile namane e tona ya tiro. Ke tshwanelo ya motswana mongwe le mongwe go thusa mo go lwantsheng borukuthi.

He rra! Tlhe e le ruri batho baa senya. Ba tshwanetswe ke tsone dikgolegelo fela. Nnyaa, mme go a utlwala. Ke tlaa thusa ka bosupi jwame.

Tsamaya o ye go thusa ka bosupi joo jwa gago. Mme ba go buse. Kana gatwe motho o tshwarwa ka loleme, kgomo ka kgole.





# MOKWALO WA KELETSO YA KABO BOSWA(WILL)



Re tswa phitlhong ya ga Sejatlhapi. Mme go setse go omanelwa dithoto tsa gagwe.

Ao! Motho a ise a bo a lale bosigo bo le bongwe mo lebitleng?

Ga ke na kgang ruri! Motho yole o tlogela dithoto-thoto le bana ba ba santseng ba le babotlana. Jaanong masika a shenne meno. Yole o batla sele, yole sele. Ga go kake ga tlhoka go nna jaana, ene o ne a bapetse.

Ruri dilo di fetogile. A ke sone segompiano? Kare khutsafalo e ne e le dilo tsa maloba ele ruri! Legale le teng bo Rrangwanaagwe le tlaa tlhamalatsa dilo. Le tla aba dithoto tseo ka fa tshwanelong fa nako e goroga.


Ee, go ntse jalo. Mme kana batho ga ba tshwane. Fa e ne e le go rata game, dithoto tseo di ka bo di tlogelwa bana le motlholagadi.

A mme mogatsa Sejatlhapi o a mo tshepha? A o dumela fa a ka dirisa dithoto tseo ka kelotlhoko le go thokomela bana ba?



Tota motho ga a itsiwe e se naga,  
matlhalerwa a mantsi. Go ja gona le  
mathata a gone. Mme mogatsa  
Sejatlhapi ene ke mosadi yo o  
wetseng dibete.

Ga ke tshophe ope fa go tla mo bosweng.  
Batho ba a fetoga, le ene mosadi a fetoge  
moloji, mmolai wa ga mogatse. Ka moo  
batho ba leke go mo rontsha ditshwanelo  
tsa gagwe. Ba bangwe basadi ba itewa  
tsebe ke boswa ba lebele le bone bana ba  
bone tota. Bo matsalaagwe bone eketse  
ga a ise a ko a ba itse.



Ke dikile ke bonye bothata joo ka lesa Nthoi. Bana ba  
gagwe le mosadi bane ba sala ba le baeng mo ga bone. E rile  
fa go duwa ko phithlong fela batsadi ba bo ba kopana ba  
laola gore dithoto tsothle di phuthwe di bo di lotlelelwa mo  
tlung. Matsalaagwe a bo a gapa dilotlolo tsa ntlo. Bana le  
mosadi ba tlogelwa kwa ntle mo serameng. Mogolowe ene  
a bo a ithaopa ko morakeng. Dikgomo tseo di kae gompieno,  
di jelwe ke Gasenna le Gakeitse.

Bana le sekolo se padile,  
go sena se ba se aparang.  
Selalelo mo isong sa re ke kae!  
Batho bao ba latswitse dithoto  
tsa ga Nthoi.



A matlhotlha pelo!  
Masiela le dikhutsana  
baa sotlega e le ruri.  
Tota ke seemo se se  
maswe! Fa baswi ba  
ne ba bona ruri!

Mme kana batho  
ga ba reetse, le ba ba  
iteilweng scatla tota.  
Gape le fa ba utlwa,  
baa dumela, mme ba  
nna maoto a tshupa.  
Ba bolawa ke "ke tlaa"  
mme kana "ke tlaa"  
o lebelo.



O raya jang  
Rrantsho? Ba  
utlwa eng?

Mogakolodi a re motho  
o tshwanetse go sireletsa  
ba lelwapa la gagwe  
mo botshelong le mo  
lesong tota. Se o  
tshwanetseng go se  
dira ke go laola kafa  
dithoto tsa gago di ka  
abiwang ka teng mo  
boseong jwa gago o  
sale botshelong.



Owai! Fa o sule o  
sule. O na le eng le  
tsa lefatshe le? A ga  
o itse gore gatwe re  
tsile re sa tshola sepe  
mo lefatsheng mme  
re tlaa bowa fela jalo?

Gakogelwa gore  
le fa go ntse jalo, o  
tlogela bana, mosadi  
le dithoto. Tse tsotlhe  
di thokana le wena.

Ke dumalana sentle  
le wena. Wa re mme  
go ka tweng ka ga  
go yo o itseng nako  
ya gagwe?

Mogakolodi gape a re  
fa o santse o le mo  
botshelong, o tshwanetse  
go laola gore motlhang o  
tlhokafalang o eletsa  
gore dithoto tsa gago di  
dirisiwe jang, le gore  
di abije jang. Ke raya  
o tlopha baja boswa  
ba gago. Keletso eo  
o ka e dira ka  
mokwalo (Will).



Ija! Ijaa! Go dira jalo ke go hutsa motho, batho ba ka swa ba bo ba felela. Basha ruri ga lo tlotle meila. Ke sone se loso lo atlileng jaana.

Nyaa rra. O abo o dira keletso ya gago le se se tshwanetseng. Ke tsamaiso e e botlhokwa thata. Ga go tsuulole meila epe. O dira mokwalo wa keletso (Will) ya gago fela.

Ware mokwalo? Nna le gaegoletwe ga ke a e bona. Nka kwala dilo tseo jang? A ga nkake ka bua fela ka molomo?

Fa o sa ite go kwala, batla mongwe yo o mo tshephang gore o ka tshwara ka tlhaa, go go thusa. Kana mokwalo o, ke keletso ya gago. Ka o ne mokwalo wa keletso (Will) o, o ka tlhophla motlhokomedi wa dithoto tsa gago, baja boswa, jalo jalo. Go na le batho ba o sa batleng gore ba ka nna le seabe mo dithoteng tsa gago. E ka nna bana ba gago, mosadi wa gago, ba losika, mang kana mang, bao le bone o ka ba kgaphela kwa thoko ka mokwalo o. Gape o kgona go laola gore o fitlwe kae le gone jang.



Tota ke mang yo o ka obamelang mokwalo o? Gape ke mang yo o ka tshephang gore o dirilwe ke nna?

Fa mokwalo wa keletso o kwadilwe sentle ka fa molaong, mongwe le mongwe o tshwanetse go o obamela le ba ba di thogo di thata tota, mme ba o diragatse fela jaaka o laotse. Mokwalo o fa o sena go o dira, o o baya monwana wa gago, o na le basupi ba le babedi, ba ba tshwanetseng gore ba o bee monwana o ba lebile gape ba le mmogo. Batho ba e seka ya nna bangwe ba baja boswa jwa gago ka gore seo se ka ba kganela go nna le seabe mo dithoteng tsa gago.



Fa ke sa itse go kwala jaana, nka o baa monwana jang?

Moo ke kgetse e potlana. O ka dira sefapaano kampo o gatisse monwana wa kgonotswe. Gape o ka kopa mongwe gore a go beele monwana. Yo o go beelang monwana o tshwanetse go dira jalo o mo lebile.

Fa ke sena go o dira, ke o isa kae?

O ka o baa fa go sireletsegileng. E ka nna kwa agenteng ya gago, kwa go Mokwaledi wa Dikgotla tsa Ditsheko (Registrar & Master of the High Court) kana kwa bankeng ya gago.



Ka gore mokwalo o o sephiri, batho ba tlaa itse jang gore ke o dirile le gore o kae?

Fa o sena go tlhokafala dithoto tsa gago dia phuruphutshwa. Fa di ntse di phuthwa jaana, go kgonnga gore mokwalo wa keletso o bonale. Gape o ka tswa o boleletse mongwe wa bana ba gago ka one. Le bone ba ba neng ba go supela tota ba kgona go gakologelwa.



Dikgato tse di tsewang fa mokwalo wa keletso o bonetse ke dife?

Mokwalo wa keletso o balelwa ba losika mme go tswa foo o tsewe o isiwe kwa go Mokwaledi Mogolo wa Dikgotla tsa Ditsheko (Registrar & Master) go bulelwa faele (file) gore thulaganyo ya go phutha dithoto tsa moswi e simolole. Gape Mokwaledi o tlhokana le tse di latelang:

- a) *Setlankana se se supang gore mokwadi (Testator) ga a sale botshelong (Death Certificate)*
  - b) *Kitsiso ya loso (death notice)*
  - c) *Mokwalo o o supang dithoto tsa moswi (inventory)*
- Fa tsothe tse di le teng, go tlaa bo go dirwa faele (file).



Mmmm! Dilo tsa lona di dintsi jang! Ke tsaya kae dikwalo tse tsothe?

Setlankana sa loso sone se tsewa kwa sepateleng se moswi a tlhokafaletseng kwa go sone. Tse dingwe difomo o ka ya go di tsa kwa ofising ya ga Mokwaledi wa Dikgotla tsa Ditsheko.

Jaanong fa dilo tse tsothe di sena go tlisiwa le faele (file) e sena go bulwa dithoto tsona di kgobokanngwa di bo di abiwa ke mang?

Motho yo o tlhophilweng ke moswi kana agente ya gagwe o tshwanetse gore gone foo a kope go fiwa tletla ya go kgobokanya le go aba dithoto tse (letters of Administration) mo go Mokwaledi wa Dikgotla tsa Ditsheko.



A tsone dikwalo  
tseo di a duelelwa?

Nnyaa ga di duelelwe. Ka fa molaong motho yo o  
tlophilweng go kgobokanya le go aba dithoto o  
tshwanetse go ntsha madi mangwe a itshireletso (security).  
Ke gore madi a e kareng fa a dirile bongwe botlhaswa  
a gapiwe go duela molato o. Mme gantsi fa moswi a  
tlophile motho yo a mo tshaphang o mo golola mo go  
dueleng madi ao. Se o se dira mo mokwalong o (Will).



Ke a utlwa rra. Botshelo bo marara, melao le yone e marara.  
Ke dumela fa melao e diretswwe go re tlofofaletsa dilo.  
Gongwe mokgwa o wa go rulaganyetsa kabo ya dithoto tsa  
boswa o ka re thusa mo diathheng tse di tsetsetseeng tse di  
rakalalang marung jaaka manong a emetse e e neelang mowa.

Go ntse jalo rra. O ka  
sireletsa ba lelwapa la  
gago mo go o ne  
manong ao.



Ija, ke lebala sengwe ke se. Gongwe motlha mongwe Mogakolodi o kile a se tshwaela. Kana go dira mokwalo o, ga go reye gore motho o tsoga a sule. Morago ga malatsi motho o kgona go fetola maikutlo mabapi le kabo dithoto tsa gagwe. A mme motho o ka fetola mokwalo wa gagwe?

Go ntse jalo rra, mokwalo o, ke wa gago. O kgona go dira sengwe le sengwe se o se batlang ka one. O ka o tihanogela wa dira o mosha kampo o dire o mongwe o o fetolang dintlha dingwe tsa one (codicil).



A go tlokega gore nka ya go tsaya meriti ya mkwalo ya ntlha gongwe le gongwe kwa eleng teng fa ke fetotse maikutlo?


Go lekane fela gore fa o fetotse maikutlo o dire mokwalo o o supang diphetogo tse o batlang go di dira. Mokwalo o ke one o tsewang e le maikutlo a bofelo.

A kere, ke batla go fetola dintlha dingwe fela mo go one? A ke tshwanelwa ke go batla basupi gape?

Netefatso ya mokwalo e tswa mo basuping ba gago. Mokwalo wa keletso (Will) mongwe le mongwe o tshwanetse go supiwa ka fa ke tihalositseng ka teng.







O raya gore ke tshwanetse go supelwa ke bone basupi bale ba pele?


Mosupi e ka nna mongwe le mongwe yo o lekaneng go supa. Ga go patike gore e nne bone bale ba pele.

"Botshelo! Marara a raraaneye."

## Mme ela tlhoko tse di latelang!

Mongwe le mongwe o ka dira mokwalo o, le ngwana wa dingwaga tse di lesome le borataro, fela fa a itse se a se dirang.

Mosupi ga a letlelelwe go nna le seabe mo dithotong tsa moswi.



Gape motho yo o tlhophilweng go phutha le go kgaoganya dithoto ga a tshwanela go nna mosupi.





### **CONTACT DETAILS**

For further information you may contact  
the Master's Office:

**HIGH COURT**  
Gaborone Division  
**+267 3718000**

**HIGH COURT**  
Francistown Division  
**+267 2412125**

Website: [www.justicegov.bw](http://www.justicegov.bw)

**Tollfree Number:**  
High Court - Francistown Division  
**0800 600 947**

**Tollfree Number:**  
High Court - Gaborone Division  
**0800 601 027**

**Tollfree Number:**  
High Court - Lobatse Division  
**0800 600 922**